

УЧИНЧИ БЎЛИМ

ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ ҚАРОРИ

399 Республика болалар ижтимоий мослашуви марказини янада ривожлантириш чора-тадбирлари тўғрисида

Республика болалар ижтимоий мослашуви марказини янада ривожлантириш ва унинг ижтимоий ночор гуруҳларга тегишли болаларга ва уларнинг оилаларига ижтимоий-педагогик, ҳуқуқий ва ахборот-таълим ёрдами кўрсатишга доир фаолиятини кенгайтириш учун зарур шарт-шароитлар яратиш мақсадида Вазирлар Маҳкамаси **қарор қилади:**

1. Ўзбекистон Республикаси Халқ таълими вазирлиги, Республика болалар ижтимоий мослашуви маркази ва Молия вазирлигининг:

муҳандислик тармоқлари ва коммуникацияларини модернизация қилиш, ногирон болалар учун махсус сузиш бассейни қуриш ва зарур асбоб-ускуналар ва жиҳозлар билан қўшимча жиҳозлаш йўли билан Республика болалар ижтимоий мослашуви марказининг (кейинги ўринларда Марказ деб аталади) моддий-техника базасини мустаҳкамлашни;

2012 — 2014 йиллар мобайнида Қарши, Самарқанд ва Фарғона шаҳарларида Марказнинг минтақавий филиалларини босқичма-босқич ташкил этишни назарда тутувчи 1-иловага* мувофиқ Республика болалар ижтимоий мослашуви маркази фаолиятини янада ривожлантириш тадбирларини амалга ошириш тўғрисидаги таклифига розилик берилсин.

2. Қашқадарё, Самарқанд ва Фарғона вилоятлари ҳокимликлари:

Марказнинг минтақавий филиалларини жойлаштириш учун 1-иловада кўрсатилган муддатларда тегишли бинолар ажратсинлар;

Ўзбекистон Республикаси Ташқи иқтисодий алоқалар, инвестициялар ва савдо вазирлиги билан биргаликда қурилиш ишларини молиялаштириш ҳамда зарур асбоб-ускуналар ва жиҳозлар харид қилиш учун хорижий ва маҳаллий ташкилотларнинг грант маблағларини жалб этиш юзасидан аниқ чора-тадбирларни амалга оширсинлар.

3. Республика болалар ижтимоий мослашуви маркази фаолиятини янада ривожлантириш тадбирларини амалга ошириш учун 2-иловага* мувофиқ рўйхат бўйича хўжалик юритувчи субъектлар ва ташкилотларнинг улар томонидан ихтиёрий мурувват ёрдами кўрсатиш тўғрисидаги ташаббуси маъқуллансин.

4. Ўзбекистон Республикаси Молия вазирлиги Марказ ходимлари сонининг 4 нафарга кўпайиши билан боғлиқ қўшимча харажатлар учун жо-

* 1-2-иловалар берилмайди.

рий йилда зарур бюджет маблағлари ажратсин, 2012 йилдан бошлаб эса — ушбу харажатларни қоплаш ҳамда Марказнинг ташкил этилаётган минтакавий филиаллари таъминотига республика бюджетининг таълим соҳасига йўналтирилаётган маблағлари ҳисобига Ўзбекистон Республикаси Давлат бюджети параметрларида маблағларни назарда тутсин.

5. Марказ, Қашқадарё, Самарқанд ва Фарғона вилоятлари ҳокимликлари хорижий ва маҳаллий ташкилотларнинг грант маблағларидан мақсадли фойдаланилишини таъминласинлар ҳамда ҳар ярим йиллик яқунларига кўра Вазирлар Маҳкамасига Республика болалар ижтимоий мослашуви маркази фаолиятини янада ривожлантириш тадбирларининг амалга оширилиши тўғрисида ахборот тақдим этсинлар.

6. Вазирлар Маҳкамасининг «Республика болалар ижтимоий мослашуви марказини ташкил этиш тўғрисида» 2004 йил 7 сентябрдаги 419-сон қарорига (Ўзбекистон Республикаси ҚТ, 2004 й., 9-сон, 91-модда) 3-иловага мувофиқ ўзгартиришлар киритилсин.

7. Мазкур қарорнинг бажарилишини назорат қилиш Ўзбекистон Республикаси Бош вазирининг биринчи ўринбосари Р.С. Азимов ва Ўзбекистон Республикаси Бош вазирининг ўринбосари А.Н. Арипов зиммасига юклансин.

**Ўзбекистон Республикасининг
Бош вазири**

Ш. МИРЗИЁЕВ

Тошкент ш.,
2011 йил 23 сентябрь,
267-сон

Вазирлар Маҳкамасининг
2011 йил 23 сентябрдаги 267-сон қарорига
3-ИЛОВА

**Вазирлар Маҳкамасининг «Республика болалар
ижтимоий мослашуви марказини ташкил этиш тўғрисида»
2004 йил 7 сентябрдаги 419-сон қарорига киритилаётган
ўзгартиришлар**

1. 2-банднинг биринчи хатбошидаги «65» ва «36» рақамлари тегишли равишда «69» ва «40» рақамлари билан алмаштирилсин.

2. 2-иловада:

а) «Ахборот-консалтинг хизмати» устундаги «13» рақами «17» рақами билан алмаштирилсин;

б) илова охиридаги матнда «65» ва «36» рақамлари тегишли равишда «69» ва «40» рақамлари билан алмаштирилсин.